

紀元通考

一


紀元通考

序

易言結繩易爲書契百官以治謂文書也萬民以察謂契券也其時有甲子無年號國君之年以元二紀人心尙質未聞滋僞也觀秦二世登泰山立碑謂金石刻辭先帝所製而不稱始皇帝疑於後嗣之爲丞相斯等因請刻詔書以示別白蓋已患紀載之無辨矣高帝初興以漢紀年閱世則已窮於是有中元下元之制可見世風日下欺詐漸生年號之興亦時勢所至不得不然顧漢武建元實緣符瑞而起歷代沿之屢有更改仍多未便自明以前在位久而年號不更者漢明宋文唐高祖太宗憲宗金世宗元世祖數君而已夫年號之紀義取正大若乃運類

走軍成負人戈昌有二日之象正止一年之期穿鑿忌諱原可
不必然或漫無檢覈而取前代之號以紀年有同至三四次五
六次不已者如漢武帝哀帝之太初晉惠帝元帝之建武唐高
宗肅宗之上元元世祖順帝之至元則近在一代更爲不倫餘
或號同僭竊號同外夷甚至同於盜賊如永樂爲方臘之號天
啟爲徐壽輝之號難免有識者譏而晉康帝之建元同於劉聰
恭帝之元熙同於劉淵海西公之太和同於石勒希跡寇仇尤
有不可解者此宋太祖所以有宰相須用讀書人之歎也秀水
葉子維庚著紀元通攷一書凡古今正閏各主下逮外國至於
僭賊皆釐而輯之經以年表緯以編韻辨前後之異同證古今

之得失又得武進李申耆先生爲之商榷以視封演之古今年
號錄宋庠之紀元通譜楊億之厯代紀年賦益詳且審矣昔孔
子作春秋首重書元之義孟子言知人必先論世然則葉子是
書之成其爲有用豈小也哉安化陶澍



序

紀元之書纂者不一近代如吳氏之改元攷同萬氏之紀元敘
韻鍾氏之厯代建元攷號爲精密然年數支干往往舛訛且於
僭偽外藩諸年號缺焉不詳甚矣成書若是之難也秀水葉君
兩垞以淹貫之才尤長史學病諸家疎漏取厯代元號年數疊
輯排比經始於嘉慶辛酉三閱寒暑始脫稿君後入詞館復以
改官需次京師值余倅直春明時與縱論詩文而是書則未之
見歲戊子視學江左駐節江陰君適宰是邑公暇輒相過從因
出以見示始得卒讀尊帝統別正閏廣稽核敘韻以資檢尋立
表以晰年世博采精核體例賅備洵駕諸作者之上者也余性

嗜乙部書嘗欲以尙書爲經以諸史爲緯倣大學衍義補之例
勒成一書人事忽忽此志未逮君精熟史事如肉貫鼎幸得久
聚方欲商榷討論以藏素願乃歡聚未旣又復受代行將別君
而去何聚之難而別之易使不得常獲良友之益則握手言別
其惻惻宜何如也夫吾人生數千百年中特大海一浮漚耳而
忽聚忽散猶不可思議如此矧夫古今之遞嬗人事之遷易夢
無紀極而可不爲之鉤元而挈衡乎然則是書之作其烏可已
哉瀕行卽書之以爲序

道光戊子季秋海鹽館愚弟朱方增誤

自有熊氏黃帝始造甲子厯金天高陽高辛唐虞夏商周秦至漢高惠文景二千五百五十七年皆厯厯有年次可稽而未有所爲年號者有之自漢武帝建元元年辛丑始自是厥後正統之朝與僭號之國罔不紀元或一帝而數更或一歲而屢改或南北之正朔僭池或前後之紀元勦襲紛紜煩復卽淹博之士亦病其難稽雖然黃初二月張策辨古鼎之銘乾德四年竇儀識蜀王之鏡誦其書不知其世可乎客牕暇日爰輯紀元通攷釐爲十二卷亦未必非讀史者之小補云爾

嘉慶九年歲次甲子中春月秀水葉維庚書於柿林客舍

重刊紀元通攷序

紀元通攷十二卷嘉慶朝秀水葉兩垞前輩所著也咸豐初板燬於火其文孫彥侯司馬擬重刊之出底本見示屬余校訂而爲之序公暇詳加繙檢凡古今正閏年號以至僭竊外藩皆一一臚列并前後之相同一歲之屢更者無不攷證及之其中條分縷晰經緯燦然洵足以稽古論世擴治史者之識見已顧其中尙有體例宜正者如王莽篡竊年號除年表而論不當敘列正統宜與僭竊之陳壽公孫述等同列蜀李特爲李雄之父紀元建初見晉書載記當在分霸年號之列不宜與李雄歧而二之也其僭竊漏畧之宜補者如後漢賊張曼成有神上年號東

晉桓元永始外尙有大亨建始年號南涼僭檀宏昌外尙有嘉
平年號北魏太武帝後有博真之承平年號梁有昭明太子之
子蕭棟爲侯景所立亦號天正又有蕭淵明年號天成唐有濮
王天壽年號其輔公祐於天明外仍有乾德年號後梁篡立之
朱友珪有鳳歷年號西夏有成都年號遼耶律大石於延慶康
國外仍有天德年號金有乂軍賊天賜年號元有温州賊陳空
崖正治年號明有麻城賊李天保武烈年號他如外藩交趾之
范玉上漏塗山僧三字以上皆漏畧之宜補者也其宜更正者
如蒙古之乜先乜誤作也程道養爲前蜀亂賊僭號泰始誤列
於劉宋氏帥趙廣之上合兩人爲一人按趙廣亦僭號泰始見

宋書劉粹傳隋李子和李誤作郭裘甫之維平誤作羅平宋水賊楊么久誤作麼遼東賊蒲鮮萬奴見金宣宗紀誤作富鮮萬努此皆訛誤之宜更正者也夫自唐宋以來紀元諸書不下數十種其採入

欽定四庫全書者僅我

朝鍾淵映歷代建元攷十卷提要中稱其始末詳細秩然有序惟載籍浩博蒐討難周如蜀王衍宋太祖年號與輔公祐同裘甫有維平之僭成都爲西夏之稱凡斯之類不免間有缺漏未可爲毫髮無遺云甚矣成書若是之不易而後之人讀其書者心知其失誠不容默而置之也矧校理前人著述而補正之固昔

賢所不避耶余覩記淺狹兼之簿領叢雜學殖益蕪僅就管見
所及錄而歸之匪敢云有益原書亦以見繼事者易爲力云爾
同治辛未孟冬月朔寶應王凱泰謹序

紀元通攷例言

一薛應旂甲子會紀及于明代我

朝

列聖順天應人撫有萬國

聖祖

高宗享國至六十餘年自三代以來未之有也敬謹書之以

其盛

一依韻類編通攷紀元之號以便檢閱

本朝正朔寰海同文普天共曉於卷首統系謹書之以見
天命之攸歸而類編中不敢次列

一朱子綱目晉隋之間一百七十年唐宋之間五十三年
皆不得謂之正統然欲著歷代相傳之次序則不得不
取南宋南齊南梁南陳後梁後唐後晉後漢後周之年
號故三國之繼統從朱子前後五代之繼統從溫公非
歧之也

一海內一統之世年號歸一無所用表惟割據分裂之時
彼此紀年差殊難于檢對故取三國十六國南北朝唐
末十國宋遼金元數百年系之以表其僭竊之號爲時
不久無關攷據外藩之號多荒忽不可憑無從定其時
代故概不入表

一年表年經國緯皆以中朝正朔冠之庶開卷曉然

一凡史書異辭如始初初始中元建武中元之類仍兩存之博異聞也

一年號相同摘錄但著其紀元之甲子與年數之修短其僭竊之號係於何代已見類編不贅

一一年兩號三號攷止就漢晉前五代唐後五代宋元明相承之統著明之其三國十六國十國等畧見年表不重列

一古今紀年之書不下數十家如古今年號錄古今類聚年號圖嘉號錄稽古錄紀年錄通鑑目錄厯代紀要錄

紀年世運錄年號歷正閏位歷歷代紀年歷代年號元
類玉海改元類歷代紀元賦紀元通譜甲子會紀甲子
編年以及紀元彙攷紀元表紀元譜改元攷紀元敘韻
歷代建元攷等書或日月簡畧或正偽紛糅或一年數
號之未明或前後相同之未著語焉不詳未能使觀者
開卷了然是編縷析條分體例稍爲詳盡然胡身之有
言曰他人之誤我知之我之誤我不能自知之區區之
心所望 大雅正謬耳

一溫公言閱通鑑者未盡一卷已欠伸思臥能讀之終篇
惟王益柔一人耳甚矣讀書之難也

庚

學識淺陋未獲

博覽漏畧之譏知所不免

一所編首紀正統尊帝緒也次列分霸別正閏也次及僭竊外藩廣稽核也次及道經襍記無稽之語及擬議不用史書異同諸號備疎漏也次爲年表分霸之時各自爲元使歸一也次以編韻便檢閱也次著前後之相同著一歲之屢更晰雜糅也次綴集古人論說以考見得失稽古論世之學盛衰治亂之原或亦有取焉